

դերը եւ-երով սկսելն է¹⁹, որ մեր օրինակում նկատելի է 3, 5, 6, 7, 8, 9, 10, 13, 14, 15, 16-րդ տողերում, որ բացառութեամբ 6, 9 եւ 14-րդի, համընկնում են միջակէտերի եւ ստորակէտերի առաջադրած բաժանումներին: Եթէ սրան յաւելենք, որ իւրաքանչիւր տող բաժանում է միւսներից նաեւ իմաստային-տրամաբանական առումով, ապա կը տեսնենք, որ տողատումը միանգամայն ընդունելի է:

Ասուածն ի մի բերելով՝ կարող ենք վստահաբար պնդել, որ Պատմահայր Մովսէս Խորենացու Պատմութեան Բ. գրքի 4. գլխում հանդիպող հատուածն առնուած է Հայոց Հին վէպից եւ տողատուած վիճակում ունի վերելում ներկայացուած տեսքը: Չէինք կամենայ որեւէ գնահատական տալ այս տասնվեցտողեայ բանաստեղծութեանը, որովհետեւ անկարելի է գովերգել ոսկին կամ թանկարժէք ակնեղէնը. բաւարար է ասել, որ սա Գողթան երգ է, Գողթան մասունք:

ԵՐՈՒԱՆԴՈՒՆԻՆԵՐԻ ԹԱԳԱԻՈՐՈՒԹԻՒՆՆ՝ ԸՍՏ ՅՈՅՆ ՄԱՏԵՆԱԳԻՐՆԵՐԻ (ՀԵԿԱՏԷՈՍ - ՀԵՐՈԴՈՏՈՍ - ՔՍԵՆՈՓՈՆ)

Յակոբ Յարութիւնեան

Ք.ա. VI դարի սկզբներին (մօտ 580-ական թթ.), ըստ գրականութեան մէջ արմատաւորուած տեսակէտի, կործանուեց Ուրարտուի թագաւորութիւնը եւ նրա տեղում աւարտուեց Երուանդունիների համահայկական առաջին պետութեան ձեւաւորումը: Այս պետականութեան պատմութեան ուսումնասիրութեան համար առաջնահերթ նշանակութիւն ունեն յոյն մատենագիրների երկերում պահպանուած վկայութիւնները, առաջին հերթին՝ Հեկատէոս Միլեթացու, Հերոդոտոսի եւ Քսենոփոնի, որոնք ապրել են այդ ժամանակաշրջանում: Ինչպէս ցոյց են տալիս նրանց հաղորդած տուեալները, հէնց նրանց օրօք էլ առաջին անգամ իրականացուել է հայկական բոլոր տարածքների միաւորումն այս պետականութեան սահմաններում: Մինչեւ Երուանդունիները երկրի տարբեր շրջաններում, յատկապէս՝ հեռաւոր ծայրամասերում տեղի կառավարիչներն իրենց հռչակել էին անկախ՝ վարելով կենտրոնախոյս քաղաքականութիւն: Պարոյր Սկայորդին, որին Մովսէս Խորենացին համարում է առաջին Հայոց արքան, չի կարողանում իր տիրապետութիւնը հաստատել ողջ հայկական լեռնաշխարհի վրայ, որը նախկինում պատկանել էր Ուրարտուի թագաւորներին¹: Երկրում ստեղծուած իրավիճակի կապակցութեամբ Ս. Տ. Երեմեանը գրում է. «Այսպիսով, Արմէ-Շուպրիայում Ք.ա. 652-612 թուականների ժամանակահատուածում թագաւորում է Հայ-սկիւթական ծա-

գում ունեցող ցեղապետ Պարոյրը, իսկ Բիայնիլիում VI դարի սկզբներին իշխանութեան գլուխ է անցնում հայկական Երուանդունի տոհմը: Այնուհետեւ Արմէ-Շուպրիան եւ Բիայնիլին միաւորուած են եւ կազմում մի ընդարձակ Հայկական թագաւորութիւն, որը Հայերի մէջ կոչուեց Հայք, իսկ հարեւանների մէջ՝ Արմինա, Արմէնիա»²: Եթէ Ուրարտուի օրօք միասնական պետութեան գերիշխանութիւնը տարածուած էր հայկական ողջ լեռնաշխարհի վրայ, որի մեծագոյն մասը հետագայում, Երուանդունիների օրօք, ստացաւ Մեծ Հայք անուանումը, ապա այս երկուսի միջեւ ընկած ժամանակահատուածում, Ք.ա. 580-570-ական թթ., այստեղ բնակուող ցեղերի մեծ մասն իրեն անկախ էր հռչակել³: Բնականաբար ծագում է այն հարցը, թէ ինչով էր պայմանաւորուած այդ անջատուածութիւնը: Առաջին շրջանում դա արդիւնք էր ինչպէս միասնական սոցիալ-տնտեսական բազայի, այնպէս էլ հայկական կոյնէի բացակայութեան⁴:

19 Հմմտ., օրինակ, Սաթեմիկին փայցնելու տեսարանը:

1 Տե՛ս Մովսէս Խորենացի, Պատմութիւն Հայոց, քնն. քննադիրը Մ. Աբեղեանի եւ Ս. Յարութիւնեանի, լրաց. Ա. Բ. Սարգսեանի, Եր., 1991, Ա, իս, իր:

2 Հայ ժողովրդի պատմութիւն, հտ. I, Հայաստանը նախնադարեան-Քամայնական եւ ստրկատիրական կարգերի ժամանակաշրջանում, խմբ. Ս. Տ. Երեմեանի, Եր., 1971, էջ 438

3 Այս փաստի օգտին է խօսում ներկայումս յայտնաբերուած ուրարտական արձանագրութիւնների «աշխարհագրութիւնը», որոնք գտել են Մեյլիդ-Մալաթիայից մինչեւ Կասպից ծովի արեւմտեան ափերն ընկած տարածքներում: Աւելի մանրամասն տե՛ս Գ. Ա. Меликшвили, Урартские клинообразные надписи, Москва, 1960, passim; Н. В. Арутюнян, Корпус урартских клинообразных надписей, Ереван, 2001, passim:

4 Առաջացած տոհմա-լեզուային իրադրութեան կապակցութեամբ մանրամասն տե՛ս Ի. Մ.

Մանրամասն քննութեան եւ վերլուծութեան չենթարկելով այդ հիմնահարցերը՝ մենք համամիտ ենք Ի. Մ. Դեակոնովի հետեւեալ եզրայանգմանը. «Գիտութեան մէջ երկար ժամանակ գերիշխող է եղել այն տեսակէտը, ըստ որի՝ հայերն ու հայերէն լեզուն նոյնանուն լեռնաշխարհում յայտնուել են այն ժամանակ, երբ առաջին անգամ յիշատակուել է Հայաստան անունը, որը եղել է Ք.ա. VI դարում, եւ գտնուում են, որ այդ ժամանակից էլ սկսում է հայ ժողովրդի պատմութիւնը: Դա, ի հարկէ պարզամիտ կարծիք է եւ բոլոր առումներով քննադատելի»⁵: Դա իսկապէս այդպէս է, քանզի եթէ մենք սկիզբ համարենք միասնական հայերէնի ձեւաւորումը, ապա համաձայն Ստրաբոնի՝ հայերէնը lingua franca-ից՝ lingua koine-ի է վերածուել Ք.ա. II դարի սկզբներին, երբ արդէն տեղի ունեցաւ հայկական հողերի երրորդ վերամիաւորումը մէկ պետականութեան շուրջը Արտաշէսեանների կողմից (առաջինը եղել էր Ուրարտուի, իսկ երկրորդը՝ Երուսաղէմի կողմից): Այս կապակցութեամբ Ստրաբոնը գրում է. «...այնպէս որ այժմ բոլորն էլ խօսում են մէկ լեզուով (ὁμογλώττους εἶναι)»⁶: Այժմ մեզ անհրաժեշտ է պարզաբանել, թէ որ ցեղերն էին ապրում հայկական լեռնաշխարհի տարածքում եւ թէ ինչպիսի սահմաններ էր ընդգրկում Երուսաղէմիների հայկական պետութիւնը՝ համաձայն յոյն մատենագիրների, առաջին հերթին՝ Հեկատէոս Միլեթացու վկայութիւնների համապատասխան: Առաջիններից մէկը նա յիշատակում է կորակներին, որոնք ունէին կոլխիդեան ծագում, եւ այս մասին վկայում է. «Կորակներ, կոլխերի ցեղից, կոլերի հարեւա-

նութեամբ, կորակսեան ամրոցով եւ նոյնանուն երկրով»⁷: Այս վկայութիւնից դժուար է եզրակացնել, թէ կորակները կոլխիդայի որ մասում են ապրել: Հարցը բարդանում է այն պատճառով, որ կորակների մասին չեն յիշատակում յաջորդ դարաշրջանի մատենագիրները՝ Հերոդոտոսը, Քսենոփոնը, Դիոդորոս Սիկիլացին, Ստրաբոնը, որոնք բոլորն էլ բաւականին քաջածանօթ են հայկական լեռնաշխարհի հիւսիսարեւմտեան ծայրամասի ցեղերի տեղադրութեանը՝ հայ-կոլխիդա-կապադովկեան սահմանագլխին:

Գորդեան այս հանգոյցի պարզաբանման կապակցութեամբ, որ առկայ է 185-րդ հատուածում, մեզ անհրաժեշտ է տեսնել, թէ ինչ է ասում այս հեղինակը հետագայ շարադրանքում: Բարեբախտաբար մեզ է հասել նոյն հեղինակի մէկ այլ վկայութիւն, եւ 188-րդ հատուածում նա գրում է. «Մոսխեր, կոլխերի ցեղից, որոնք հարեւան են մատիեններին»⁸: Մոսխերի անունով են կոչւում նաեւ Մոսխական լեռները, որոնք Պարիադէսի կամ Պարխարեան լեռների շարունակութիւնն են (հին լատ. Moschius mons): Այժմ վերջինս աւելի շատ յայտնի է Լազիստանեան լեռնաշղթայ, իսկ Մոսխականը՝ Աջարա-Իմերեթական լեռներ անունամբ: Եթէ Հեկատէոսին յաջորդողները ոչինչ չգիտեն մոսխերի մասին, ապա դա չի խանգարել, որ նրանց վերաբերեալ բաւականին մանրամասն յիշատակի Ստրաբոնը, որը գրում է. «Մոսխիկէն (Μοσχίκται), ուր կայ նշանաւոր մի տաճար, ունի երեք մաս. առաջինը զբաղեցնում են կողքիսցիները, երկրորդը՝ վրացիները, երրորդը՝ հայերը (խօսքը վերաբերում է Լեւկոթէոսի

5 Дьяконов, Предыстория армянского народа. История армянского нагорья с 1500 по 500 г. до н. э. Хурриты, лувийцы, протоармяне, Ереван, 1968, էջ 190 եւ յաջ.:
 6 Strabo *anaginta*, էջ 195:
 7 The Geography of Strabo, L. 1960, XI, XIV, 5

7 Fragmenta historicorum graecorum, ed. C. Müller, Paris, 1883, Hecateus, fr. 185; F. Jacoby, *Fragmente der griechischen Historiker*, Lipsiae, 1923, 210 (այսուհետեւ փակագծում համապատասխան հատրւածն՝ ըստ Ֆ. Յակոբիի հրատարակութեամբ).
 8 *anaginta*, fr. 188 (F. Jacoby, 288)

տաճարին, որը գտնուում էր Յրիսկոսի պատգամախօսարանի կողքին - Յ. Յ.)»⁹: Եթէ այս նկարագիրը ամբողջովին համապատասխանում է ստրաբոնեան դարաշրջանում Մեծ Հայքի եւ Վիրքի միջեւ գոյութիւն ունեցած սահմաններին, ապա պէտք է եզրակացնել, որ Ստրաբոնի բոլոր միւս վկայութիւններն այս տարածաշրջանի վերաբերեալ մեծապէս փոխառուած են Հեկատէոսից: Դա շատ դէպքերում այդպէս է, միայն այն տարբերութեամբ, որ նա երբեմն յաւելում, լրացնում է Հեկատէոսին, յատկապէս՝ իւրաքանչիւր տեղանքի լեռնագրութեան (օրոգրաֆիայի) եւ ջրագրութեան (հիդրոգրաֆիայի) նկարագրութեամբ: Դա առկայ է նաեւ վերոյիշեալի կապակցութեամբ, երբ Ստրաբոնը գրում է. «Հայաստանի հարաւը պաշտպանուած է Տաւրոսով, որ բաժանում է այն Եփրատի եւ Տիգրիսի/միջեւ գտնուած ամբողջ երկրից, որը կոչւում է Միջագետք: Արեւելից այն սահմանակցում է Մեծ Մարաստանին եւ Ատրպատականին, հիւսիսում գտնուում են Կասպից ծովից վերեւ՝ Պարաթոսի լեռները եւ Աղուանքն ու վրացիները եւ Կովկասը, որ շրջապատում է այդ ժողովուրդները եւ, հասնելով Հայաստանին, միանում է Մոսքիկեան եւ Կողքիսի լեռներին, մինչեւ Տիբարենների կոչուած երկիրը: Արեւմուտքում գտնուում են այս տիբարենի ժողովուրդը եւ Պարիադէս լեռը, եւ Սկիւդիսես լեռը՝ մինչեւ Փոքր Հայք եւ Եփրատի հովիտը, որ բաժանում է Հայաստանը Կապադովկիայից եւ Կոմագենից»¹⁰: Ստրաբոնի այս վկայութիւնը պարզորոշ ցոյց է տալիս, որ այն արդէնք է նախկին մի քանի սերունդների հաղորդած վկայութիւնների վերամշակման՝ սկսած Հեկատէոսի յայտնած տուեալներից եւ վերջացած Դիոդորոսի վկայութիւննե-

րով: Ի՞նչն է մեզ առիթ տալիս նման ենթադրութեան: Վերեւում նշեցինք, որ ըստ Ստրաբոնի՝ Ք.ա. II դարի սկզբին Մեծ Հայքի թագաւորութեան բոլոր ծայրամասերում խօսում էին հայերէն, բայց, միաժամանակ հետեւելով նախորդ դարաշրջանի մատենագիրներին, նա կրկին յիշատակում է որոշ ոչ հայախօս ցեղերի վերաբերեալ, որոնք պէտք է որ արդէն ձուլուած լինէին տեղաբնիկների, իսկ առաջին հերթին՝ հայերի եւ վրացիների հետ: Հեկատէոսը, ինչպէս նշուեց վերեւում, խօսում է մոսխերի, մատիենների եւ տիբարենների վերաբերեալ, որը կրկնում է Պատմահայր Հերոդոտոսը: Քսենոփոնն իր Անաբասիսում երկիցս յիշատակում է տիբարեններին, իսկ Դիոդորոսն ընդհանրապէս ոչինչ չգիտէ նրանց վերաբերեալ: Վերջինիս կրտսեր ժամանակակից Ստրաբոնն, ինչպէս տեսանք, բազմիցս խօսում է ոչ միայն մոսխերի, այլեւ տիբարենների վերաբերեալ:

Հեկատէոսի եւ Ստրաբոնի վկայութիւնների համադրութիւնը ցոյց է տալիս, որ մոսխերը տեղակայուած են եղել Փասիս կամ ներկայիս Փոթի եւ Տրապիզոն քաղաքների միջեւ, իսկ աւելի ստոյգ՝ Ճորոխի (Արպաս, Ակամսիս, Բոաս) գետաբերանում եւ ստորին հոսանքի շրջանում՝ ներկայիս Աջարիայի տարածքում: Նոյնն է վկայում նաեւ Հերոդոտոսը, երբ տալիս է Աքեմենեան Իրանի վարչա-տարածքային բաժանման նկարագիրը (Դարեհ Ա-ի դարաշրջանում): Վերջինս գրում է. «Մոսխերի, տիբարենների, մակրոնների, մոսսի-նոյկների եւ մարերի վրայ սահմանուեց երեք հարիւր տաղանդ (հարկ). սա տասնիններորդ նահանգն էր»¹¹: Այս յիշատակումը համարեա ոչնչով չի տարբերում նրա մէկ այլ վկայութիւնից, որտեղ պատմիչը խօսում է պարսիկների՝ Յունաստան ար-

9 Strabo, XI, II, 18
 10 *anaginta*, XI, XIV, 1. տե՛ս նաեւ I, III, 21; XI, II, 1; XI, XII, 4; XII, III, 18:

11 Հերոդոտոս, Պատմութիւն ինը գրքից, Թարգմ. Ս. Մ. Կրկեաշարեանի, Եր., 1986, III, 94

շաւելու մասին¹²: Այստեղ եւս մոսիսերի կողքին, նոյն զօրաշարքում են հարեւան ժողովուրդները՝ տիրարենները, մակրոնները եւ մոսսինոյկները: Ինչ վերաբերում է մատիեններին, ապա այստեղ եւս Հեկատէոսին կրկին լրացնում է Հերոդոտոսը, որն առաջին իսկ յիշատակութեան ժամանակ նրանց տեղակայում է Հալիս (ներկայիս Կըզըլ-Իրմակ) գետի աջ ափին՝ գրելով. «Քանզի մեղական տէրութեան եւ լիւդիական տէրութեան միջեւ սահմանը Հալիս գետն էր, որը հոսում է Հայկական լեռներից Կիլիկիայի միջով, այնուհետեւ (հոսում է)՝ աջից մատիեններին եւ ձախից փոլեզիացիներին սահման ունենալով»¹³: Այսպիսով, եթէ համարենք, որ խօսքը միեւնոյն ցեղի մասին է (այլ ոչ թէ նոյնանուն երկու ցեղերի), ստացւում է, որ Հեկատէոսից մինչեւ Հերոդոտոսն ընկած ժամանակահատուածում, մօտ 20-30 տարիների ընթացքում, մատիեններն Ակամսիս գետի աւազանից շարժուել են արեւմուտք եւ զբաղեցրել Հալիսի աջ ափը¹⁴:

Մատիենների կապակցութեամբ պէտք է կատարել նաեւ հետեւեալ պարզաբանումը: Հեկատէա-հերոդոտոսեան մատիեններին չպէտք է նոյնացնել ստրաբոնեան մատիանների հետ (ματιανή-ματιανή), որը կատարում է Գ. Ա. Ստրատանովսկին Ստրաբոնի Աշխարհագրութեան ուսուցչին թարգմանութեան մէջ: Վերջիններիս կապակցութեամբ Ստրաբոնը ոչ միայն մանրամասն նկարագրում է նրանց զբաղեցրած տարածքը, այլեւ տալիս կենցաղի նկարագիրը: Անդրադառնալով Ատրպատականեան Մարաստանի տեղադրութեան խնդրին՝ նա գրում է. «Երկիրը գտնւում է արե-

12 Strabo, XI, XIII, 2.
 13 Նոյն տեղում, I, 72, նաեւ՝ III, 94, V, 49, VII, 72.
 14 Յ. Խորիկեան, Սատրապական Հայաստանի արեւմտեան եւ հարաւային սահմանները մ.թ.ա. VI-IV դարերում, «Պատմա-քաղաքագիտական հանդէս», 2005, թիւ 3, էջ 173-192:

ւելքից՝ Հայաստանի եւ Մատիանէի (եւ ոչ թէ Մատիենէի - Յ. Յ.) մօտ, արեւմուտքից՝ Մեծ Մարաստանի, իսկ հիւսիսից՝ այս երկու երկրների մօտ: Հարաւից գտնւում է Վրկանաց ծովի խորքի շուրջը տեղակայուած երկրների եւ Մատիենէի մօտ»¹⁵: Այնուհետեւ նա այդ մարզը համեմատում է Շակաշենէի (այսինքն՝ Ուտիք նահանգի մի հատուածի) եւ Արաքսենէի հետ՝ հաւանաբար նկատի ունենալով Արաքսի գետաբերանը: Այստեղ խօսքը Հայկական Արաքսի մասին է, քանզի հետագայ շարադրանքում, հետեւելով Հերոդոտոսին, նա այս Արաքսը համարում է ջրային սահման Հայաստանի եւ բուն Մարաստանի (եւ ոչ թէ Մեծ Մարաստանի կամ Մարական կայսրութեան) միջեւ, որի հիւսիսային մասը նա անուանում է Մատիենա, որն իրականում լինելու էր Մատիանա¹⁶: Հերոդոտոսն, ի տարբերութիւն Ստրաբոնի, սխալւում է, երբ բաժանում է Արաքսը քառասուն ճիւղերի, որն աւելի նման է Օքսին կամ Ամու-Դարիային կամ էլ Եփրատին, որն այժմ կոչւում է Սիր-Դարիա: Այս գետերն անտիկ հեղինակները յաճախ են շփոթել: Նոյնին մենք հանդիպում ենք նաեւ Ստեփանոս Բիւզանդացու մօտ, երբ նա նշում է. «...միւս Արաքսը, որ Փասիսում է, քանզի այդպէս է կոչում Պենէոսը αραξοί բայից, որ նշանակում է պատուել: Տեղացիներն անուանում են Արաքսեան ջուր»¹⁷: Որ Մատիենան

15 Strabo, XI, XIII, 2.
 16 Strabo, XI, XIV, 13: Արաքսի խնդիրն հանգամանորէն քննարկուել է Ա. Վ. Պողոսիանովի կողմից: Strabo T. H. Джаксон, Т. М. Калинина, И. Г. Коновалова, А. В. Подосинов, Речные пути Восточной Европы в античной и средневековой географии, Москва, 2007, էջ 94-95 (հեղ. Ա. Վ. Պողոսիանով):
 17 Stephani Byzantii, Ethnicorum quae supersunt. Ex recensione A. Meinekii, v. I, Ber., 1849, Արաքս յօդուածը. տե՛ս նաեւ В. В. Латышев, Известия древних писателей о Скифии и Кавказе, ВДИ, 1948, N 3, էջ 315:

տեղակայուած է եղել Սեւ ծովի ափին՝ Ճորոխի գետաբերանի հիւսիս-արեւմուտքում Պարիադրէսի լեռների, իսկ հիւսիս-արեւելքում՝ Մոսիսականի միջեւ՝ մոսիս ցեղերի հարեւանութեամբ, կարելի է եզրակացնել Հեկատէոսի մէկ այլ վկայութեան օգնութեամբ: Վերջինս նշում է, որ այն գտնուել է ծովի մօտ եւ անտառածածկ լեռների հարեւանութեամբ¹⁸: Այդ լեռների մասին նա մասնաւորապէս խօսում է 285-րդ հատուածում եւ դրանք անուանում է Ռիպէական: Այդ անուանումն, ըստ Լ. Ա. Ելնիցկու կարծիքի, կապուած է աստուածաշնչեան Ռիֆի կամ Ռիֆատի հետ¹⁹: Rip(h)aeus montes անուանումն, ըստ մեզ, ունի լատինական ծագում եւ նշանակում է պարզապէս ծովափ: Այստեղից բխում է այլ հարց, թէ ո՞ր լեռներն է յոյն Հեկատէոսն անուանում այդպէս. Կովկասեան, որտեղ նրա/իւ իր հայրենակիցների համար աւարտուում էր օյկումենէն այդ ժամանակ, Պարիադրէսեան, թէ՛ գուցէ Մոսիսական: Մեր կարծիքով, խօսքը վերաբերում է վերջին երկուսից մէկին, որոնք Հեկատէոսի օրօք միասին վերցրած կոչուել են Պարալիա լեռներ (Παραλία - յուն. ծովափ բառից): Այդ տեղանքն այժմ էլ ծածկուած է համարեա անանցանելի անտառներով: Հռոմէացիները, որոնք փոխարինեցին յոյներին փոքրասիական մերձսեւծովեան շրջաններում, այդ տեղանքն անուանելիս կատարեցին պարզապէս բառացի թարգմանութիւն եւ Պարալիան վերանուանեցին Ռիպէական լեռներ: Ինչ վերաբերում է Կովկասեան լեռների անուանմանը, ապա ե՛ւ յոյները, ե՛ւ հռոմէացիները Կովկասը (Καύκασος, Caucasus) ի սկզբանէ կոչել են այդպէս: Աւելին՝ երբեմն Կովկաս են ա-

18 Hecateus, fr. 282-285.
 19 Л. А. Ельницкий, Знание древних о северных странах, Москва, 1961, էջ 69; А. В. Подосинов, Произведения Овидия как источник по истории Восточной Европы и Закавказья, Москва, 1985, էջ 152, 159.

նուանել նաեւ ներկայիս Հինդուկուշը (Caucasus Indicus) եւ Պամիրը (Paropamisus)²⁰: Չի կարելի բացառել, որ սխալը հետեւանք է հետագայ արտագրողների անուշադրութեան: Ինչպէս յայտնի է, Հեկատէոսին արտագրող Ստեփանոս Բիւզանդացին եւս ստեղծագործել է Հին յունարէն, բայց չպէտք է մոռանալ, որ յունարէնն արդէն չունէր այն ազդեցութիւնն Արեւելքում, որը կար նախկինում՝ սկսած յունական մեծ գաղութացման շրջանից, իսկ առանձնապէս՝ հելլենիզմի օրօք:

Մատիեններից անցում կատարենք տիրարեններին, որոնց մասին խօսեցինք վերելում: Հեկատէոսը վկայում է. «Տիրարենների կողքին՝ արեւածագի ուղղութեամբ, սահմանակցում են մոսսինիկները, որոնք ունեն խէյրադի քաղաքը»²¹: Բարեբախտաբար, այս ցեղերի մասին վկայութիւններն աւելի մանրամասն են: Տիրարենների երկրի վերաբերեալ բաւականին մանրամասն, ականատեսի աչքերով խօսում է Քսենոփոնը՝ գրելով. «Այս երկրի միջով (խօսքը մոսսինոյկների երկրի մասին է - Յ. Յ.), ինչպէս թշնամական, այնպէս էլ բարեկամական հելլեններն անցան ութը կայեան եւ հասան խալիւքներին: Սրանք փոքրաթիւ էին եւ հպատակուում էին մոսսինոյկներին. նրանց մեծագոյն մասի ապրուստի աղբիւրը երկաթագործութիւնն էր: Այստեղից նրանք հասան տիրարենների մօտ: Տիրարենների երկիրը առաւել դաշտային էր, եւ այնտեղ կային առափնեայ բնակավայրեր, որոնք պակաս ամրացուած էին: Զօրավարները ցանկանում էին յարձակուել այդ բնակավայրերի վրայ եւ այդպիսով զօրքի համար որեւէ բան ձեռք բերել, ուստի եւ նրանք չընդունեցին տիրարենների ուղարկած հիւրընկալման ընծաները, այլ պատուիրելով

20 Strabo Ф. Любкер, Иллюстрированный словарь античности, Москва, 2005, էջ 938:
 21 Hecateus, fr. 193.

նրանց սպասել մինչև իրենց խորհրդակցելը՝ զոհեր մատուցեցին: Եւ բազում զոհաբերութիւններ կատարելուց յետոյ ի վերջոյ բոլոր գուշակները յայտարարեցին, թէ աստուածները ոչ մի դէպքում համաձայն չեն պատերազմին: Ուստի եւ նրանք ընդունեցին հիւրընկալման ընծաները եւ, երկու օր ընթանալով այդ երկրի միջով իբրեւ բարեկամներ, հասան հելլենական Կոտիւորա քաղաքը, որը Սինոպի քաղաքացիների գաղութն էր տիրաբնեցի երկրում»²²:

Այս նկարագիրը, որ մեզ հրամցնում է վերոյիշեալ յոյն պատմիչ-գօրավարը, լիովին համընկնում է այն նկարագրին, որ հաղորդում է Ստրաբոնը՝ գրելով. «Մասամբ Վրկանաց ծովի եւ սրա ու Պոնտոսի միջեւ գտնուած ամբողջ պարանոցի հարաւում գտնուած է Հայաստանի մեծ մասը, եւ Կողքիսն ու Կապադովկիան ամբողջապէս, մինչև Էւքսինեան Պոնտոսը եւ տիրաբնեան ցեղերը... Սրանց յաջորդում են երկրները Հալիսի միւս կողմում, որտեղ են գտնուած, առաջին հերթին, Պոնտոսի եւ Պրոպոնտոսի հարեւանութեամբ Պաֆլագոնիան, Բիւթանիան, Միւսիան եւ, այսպէս կոչուած, Հելլեսպոնտոսի Փոիւզիան, որի մի մասն է Հանդիսանում Տրովադան»²³: Աշխարհագրական քարտէզի վրայ այդ տեղանքը համապատասխանում է Հ.լ. 38 հորիզոնականին եւ արեւելքից այն սահմանակից է եղել Կերասունտ քաղաքին, իսկ արեւմուտքում հասել է մինչև Կոտիւորա քաղաքի տարածքը, որը հետագայում մտնում էր Կապադովկիա պետութեան կազմի մէջ (այստեղ էր գտնուում Եասոնի հրուանդանը)²⁴: Խիստ հետաքր-

քիր եւ ուշագրաւ է այն, որ անտիկ հեղինակներն, իսկ առաջին հերթին՝ Քսենոփոնն ու Ստրաբոնը, տիրաբնեցի հարցում միաբերան լրացնում են իրար: Եթէ մենք քարտէզի վրայ չափազանք բոլոր այն տարածքները, որ վկայում է Քսենոփոնը՝ Կունաքսայից մինչև Կոտիւորա, ապա առանց որեւէ բացառութեան այն լիովին համապատասխանում է իրականութեանը: Քսենոփոնը վկայում է. «Բարելոնի մօտ տեղի ունեցած ճակատամարտի վայրից մինչև Կոտիւորա նրանց անցած ճանապարհի երկարութիւնը 122 կայսան էր՝ 620 փարսախ՝ 18600 ասպարէզ, իսկ ամբողջ ժամանակը վեց ամիս եղաւ»²⁵: Հետաքրքիր է նաեւ տիրաբնեցի եւ ոչ միայն նրանց վերաբերեալ վերջին փաստը, որ կրկին նրա երկասիրութիւնում է. «Արքային [խօսքը վերաբերում է Արտաքսերքսէս Բ-ին - Յ. Յ.] պատկանող մեր անցած երկրների տիրակալներն էին... Մեդիայինը՝ Արբակասը, փասիանների եւ հեսպերիտներինը՝ Տիրեբազոսը, իսկ կարդուխները եւ խալիւքները եւ խալդայները եւ մակրոնները եւ կոլխերը եւ մոսսինոյկները եւ կոյտոսները եւ տիրաբնեցիները ինքնավար են»²⁶: Տիրաբնեցի ինքնավարութիւնը յուշում է այն մասին, որ նրանք, ինչպէս եւ այդ կարգավիճակում գտնուող միւսները, ունեցել են զարգացման բաւականին բարձր մակարդակ: Դա էլ հանդիսացել է այն գրաւականը, որ ապահովել է նրանց անկախ կամ կիսանկախ կարգավիճակն աքեմենեան լծից: Այստեղ, մեր կարծիքով, ոչ մի նշանակութիւն չի ունեցել տարածքային հեռավորութիւնը, ինչպէս դա, մեր կարծիքով, կոլխերի դէպքում էր, քանզի փոքրասիական-սելւոնական տարածքն ունէր կարեւոր ռազմավարական նշանակութիւն իւրաքանչիւր նուաճողի համար: Տիրաբնեցի վերաբե-

22 Քսենոփոն, Անաբասիս, թարգմ. Ս. Մ. Կրկեսաշարեանի, Եր., 1970, V, 1-3
 23 Strabo, II, IV, 31
 24 Այս տեղանքի մանրամասն նկարագիրը տես՝ М. В. Арбунов, Античная лоция Чёрного моря, Москва, 1987, էջ 48-65:

25 Քսենոփոն, V, V, 4
 26 Նոյն տեղում, VII, VIII, 25

րեալ հետաքրքիր եւ բովանդակալից վկայութիւններ կան Ստրաբոնի մօտ, որտեղ պատմիչ-աշխարհագէտը նկարագրում է նրանց առնչութիւնները հայերի հետ: Ստրաբոնը նշում է. «Փառնակիա մարզի եւ Տրապիզոնի վերելում բնակուած են տիրաբնեցիները եւ խալդէացիները (Τιβάρητους και Χαλδαίους)՝ ծաւալուելով մինչև Փոքր Հայք: Վերջինս բաւականին արգաւանդ երկիր է: Փոքր Հայքում, ինչպէս եւ Մոփքում մշտապէս իշխել են տեղի կառավարիչները, որոնք երբեմն պահպանում էին բարիդրացիական յարաբերութիւններ մնացեալ հայերի հետ, երբեմն անկախ էին նրանցից: Նրանց ենթակայ էին խալդէացիներն ու տիրաբնեցիները: Այնպէս որ նրանց պետութիւնը տարածուած էր մինչև Տրապիզոն եւ Փառնակիա»²⁷: Այսպիսով, ստացւում է, որ տիրաբնեցի երկիրը՝ Տիրաբնիան, մի որոշակի ժամանակահատուած գտնուել է Փոքր Հայքի թագաւորութեան կազմում, իսկ վերջինս էլ Փոքր Ասիայի այդ հատուածում ունեցել է ելք դէպի Սել ծով: Այս փաստի կապակցութեամբ միւս մատենագիրները լռում են, որը խօսում է, հաւանաբար, այն հանգամանքի մասին, որ այդ ելքը եղել է խիստ կարճատեւ ժամանակով եւ այս շրջանում էլ հէնց Փոքր Հայքը հասել է իր հզօրութեան գագաթնակէտին: Դրանից յետոյ Փոքր Հայքի մասին վկայութիւններն ընդհատուած են, եւ Ստրաբոնը միայն վկայում է այն մասին, թէ ինչպէս Փոքր Հայքը նուաճուել է պոնտացի Միհրդատ Զ Եւպատորի (Ք.ա. 111-63 թթ.) կողմից նրա գահակալութեան սկզբին: Այդ ժամանակ Մեծ Հայքի եւ Պոնտոսի թագաւորութիւնների միջեւ սահմանագիծն անցել է սահմանային Սինոպիա (Սիւնո-

րիա) ամրոցով, որը կառուցել էր Միհրդատը: Այս ամրոցի ստոյգ տեղն առայժմ անյայտ է²⁸, բայց ընդունուած է այն տեղադրել ներկայիս Թուրքիայում գտնուող Սազակ քաղաքի տեղում:

Ինչպէս իր հետագայ շարադրանքում վկայում է Հեկատէոսը, տիրաբնեցի հարեւանութեամբ տեղակայուած են եղել խալիւքները. «Խալիւքներ, ժողովուրդ Պոնտոսի մօտ, Թերմոզոնտես գետի վրայ: Խալիւքներին հարաւից սահմանակցում են Հայերը»²⁹: Խալիւք անուանումը նրանք ստացել են շնորհիւ իրենց հիմնական զբաղուածութեան (աշխատանքի), քանզի ձուլել են պղինձ (Χαλκοπλάστης χαλκός, լատ.՝ faber aerarium): Ինչպէս պարզաբանում է Քսենոփոնը (նկարագրելով 10.000 յոյների նահանջը), երբ զրուցել են կոմարքոսի հետ, ապա պարզուել է, որ հարեւան երկիրը. դա խալիւքների հանգրուանն էր³⁰, որը համընկնում էր խալդէացիների երկրի հետ: Խալդէացի-խալիւքների մասին խօսում են ոչ միայն պատմիչները, այլ նաեւ անտիկ թատերագրի էսքրիչսը (Ք.ա. 525-456 թթ.): Երբ նա անդրադառնում է մերձսելւոնական տափաստանների սկիւթներին, ապա գրում է. «...Կովկաս գնացողի համար ձախ կողմից տարածքը զբաղեցնում են խալիւքները, որոնք երկաթ են մշակում»³¹:

Ամէն ինչ կը լինէր բացայայտ պարզ, եթէ չլինէր Ստրաբոնի վկայութիւններից մէկը: Խալիւք-խալդէացիների գոյութեան մա-

27 Strabo, XII, III, 28: Այս հարցերին նույնպէս անդրադարձել է Ի. Նիւտոնը: Տես՝ И. Ньютон, Хронология древних царств, Москва, 2007, էջ 278, 300, 302 եւ յաջ.:

28 Տես՝ Anja տեղում:
 29 Hecateus, fr. 195 (F. Jacoby, 203)
 30 Տես՝ Քսենոփոն IV, V, 34. Ատա՛ IV, III, 4. IV, IV, 18. V, V, 17...
 31 В. В. Латышев, Известия..., ВДИ, 1947, N 1, էջ 303, 305. J. Markwart, Südarmanien und die Tigrisquellen nach griechischen und arabischen Geographen, Wien, 1930, էջ 229-230. Б. Б. Пиотровский, Урарту, Ереван, 1944, էջ 328. Յ. Մանանդեան, Երկեր, Բու. Ա, Եր., 1977, էջ 68-69

սին Հայաստանում նա յիշատակում է Ք.ա. II դարի սկզբներին տեղի ունեցած դէպքերի հետ կապում: Երբ Արտաշէսը վերամիաւորում էր Հայկական տարածքները, ապա այդ ցեղերից, ինչպէս նաեւ մոսսինոյկներից նա յետ է վերցրել Կարիւնը եւ Դերքսենեն կամ Դերջանը (Καρηνίτιν και Δερξήνην), որոնք գտնւում են Բարձր Հայք նահանգի տարածքում եւ, ինչպէս ընդգծում է պատմիչը, սահմանակցել են Փոքր Հայքին: Այս վկայութիւնը, մեր կարծիքով, չի համապատասխանում իրականութեանը: Եթէ շարժուենք ստրաբոնեան տրամաբանութեանը համապատասխան, ապա նա խալիբ-խալիբացիներին տեղակայում է համարեա ամէնուր՝ Բաբելոնում, Կապադովկիայում, Պոնտոսում... Հաւանաբար պատմիչը կ'ամ չի իմացել այդ ցեղերի անուանակոչութեան նախնական իմաստը, որը քիչ հաւանական է, կ'ամ էլ դրան չի տուել որեւէ նշանակութիւն, ուստի եւ խոսափել է պարզաբանումներից: Այսպէս, բաբելոնեան խալիբ-խալիբները Ք.ա. I հազարամեակի կէսերին (626-539 թթ.) գերիշխող դիրք ձեռք բերեցին Առաջաւոր Ասիայում, երբ հիմնեցին Նոր Բաբելոնեան թագաւորութիւնը, որի հիմնական պատճառը արտադրութիւնում երկաթի մասսայական օգտագործումն էր: Այս ասպարէզում նրանք հանդիսացան Նոր Ասորեստանեան պետութեան բնակչութեան (X-VII դդ.) գործի շարունակողները, որոնք եւս ամէնուր մասսայաբար օգտագործեցին երկաթը՝ դառնալով առաջին համաշխարհային կայսրութեան ստեղծողները:

Այսքանով կարելի կը լինէր բաւարարուել եւ վերջակէտ դնել խնդրի արծարծմանը, եթէ Հրապարակում չլինէր Պլինիոս Աւագի մի վկայութիւն եւս. «Թասիսի (Thasis) եւ Թրիարիէի (Thriarie) տարածքները հասնում են մինչեւ Պարիադրէսի լեռները, որից այն կողմ Կոլխիդայի անապատներն են (°): Այս տեղանքի հարեւա-

նութեամբ, դէպի կերտունացիները, ապրում են արմէնոխալիբները (armenochalybes), եւ մոսսիբերի տարածքն է, մինչեւ Կուրի վտակ Հիբերոսը (Hiberos): Այնուհետեւ ապրում են մակրոնները, եւ Աբսար գետն է»³²: Թէ որտեղ են գտնւում Պարիադրէսի լեռները, եւ որտեղ է տեղակայուած Կոլխիդան, դա աքսիոմայ է եւ յայտնի իւրաքանչիւրին: Ինչ վերաբերում է կերտունացիներին, ապա հաւանաբար, պատմիչն այստեղ նկատի ունի այն ցեղերին, որոնք բնակուել են Կովկասի հարաւային լանջերին, քանզի հնագոյն ժամանակներից ընդունուած էր լանջերի այդ մասն անուանել τὰ Κεραυνία ὄρη: Մեր կարծիքով, սխալուած է Փ. Լիւբկերը, երբ Կերտունեան է կոչում այդ լեռների միայն հիւսիսարեւելեան ճիւղը, որոնք ձգւում են Կասպից ծովի արեւմտեան ափի երկայնքով³³: Ինչ վերաբերում է մակրոն-մակրոններին, ապա նրանց վերաբերեալ յիշատակում են հին յունական պատմիչներից շատերը (Հեկատէոս, Հերոդոտոս, Ստրաբոն, Դիոդորոս), եւ բացառութիւն է կազմում Քսենոփոնը: Վերոյիշեալ բոլոր պատմիչները, սկսած Հեկատէոսից, միաբերան պնդում են, որ մակրոն-մակրոնները նոյն սաններն են, որոնք ապրել են մոսսիբերի եւ կոլխիբերի միջեւ: Այժմ եւս նրանք զբաղեցնում են այդ տարածքը Աջարիայում՝ բնակուելով Սարպի գիւղում՝ Սեւ ծովի ափին, վրաց-թուրքական սահմանի անմիջական հարեւանութեամբ: Այս վերլուծութիւնը բերում է այն եզրայանգման, որ, փաստօրէն, արմէնոխալիբների զբաղեցրած այն տարածքը, որ տալիս է Պտղոմէոսը, համընկնում է խալիբների մասին այն վկայութիւնների հետ, որ մենք քաղում ենք Ստրաբոնից:

32 Plinii Secundii Naturalis historiae (LCL), Camb., Mass.-L., 1950-1962, VI, II, 29
33 Տե՛ս Փ. Լիւբկեր, *Ձ. աշխ.*, էջ 502:

Այսպիսով, սկզբնաղբիւրներում մենք վկայութիւններ ունենք խալիբ-խալիբացիների եւ արմէնոխալիբների մասին: Ակնյայտ է, որ նրանք այդպէս միանման կոչուել են շնորհիւ իրենց ունեցած զբաղմունքի: Փորձենք բացել փակագծերը: Մերձսեւծովեան խալիբների եւ Բարձր Հայքում բնակուող խալիբների միջեւ ընկած է Մեծ Հայքի Սպեր գաւառը, որը հնագոյն ժամանակներից յայտնի է եղել իր ոսկու հանքերով: Հաւանաբար, այստեղ եղել են նաեւ պղնձի փոքր պաշարներ, որն արդիւնահանուել է ոսկու հետ: Այս ամէնի կողքին չպէտք է մոռանալ, որ նկարագրուող ժամանակաշրջանում Հայաստանն արդէն անցում էր կատարել բրոնզից երկաթին (նկարագրուող ժամանակից ամենաքիչը 300-400 տարի առաջ): Խալիբներն, անկասկած արդէն իրազեկ էին երկաթի գոյութեան մասին, բայց նրանց այդպէս շարունակել են անուանել աւանդոյթի ազդեցութեան ներքոյ:

Իր Նկարագրի յաջորդ հատուածում Հեկատէոսը խօսում է Ստամբնա քաղաքի վերաբերեալ, որը գտնուել է խալիբների տարածքում³⁴: Մենք, փաստօրէն պարզեցինք խալիբների բնակութեան տարածքները, եւ մնում է գտնել, թէ որտեղ է եղել վերոյիշեալ Ստամբնան: Մեծ Հայքի թագաւորութեան ուրբանիզացիայի քարտէզը, այդ թւում նաեւ՝ նրա հիւսիսարեւմտեան ծայրամասի, մեզ յայտնի է շնորհիւ Պտղոմէոսի: Նրան հերքելով՝ Ջ. Թոմսոնը գտնում է, որ անտիկ պատմիչը սխալուած է, երբ յիշատակում է Հայաստանեան 84 քաղաքների անուններ³⁵: Մեծ Հայքի թագաւորութեան արեւմտեան նա-

հանգների քաղաքներին Պտղոմէոսն անդրադառնում է §§ 14-17 եւ 19-ում: Առաջին հատուածում Ս տառով են սկսուած Սանա քաղաքը, որը գտնուել է 73° 50', 42', Սոգոկարան, որն ունեցել է 74° 41' տեղադրութիւն, Սիգուան՝ 77°, 41', Սագաւանան՝ 75° 15', 40' 45', իսկ § 19-ում յիշատակուած են Սոէյտան՝ 72° 50', 39' 30' եւ Սելտիան՝ 74° 40'³⁶:

Այսպիսով, ծագում է այն միակ հարցը, թէ որտե՞ղ պէտք է որոնել Ստամբնան: Քաղաքները, որ յիշատակուած են §§ 14-17-ում, պատմիչը տեղակայում է Մեծ Հայքի Բասիլիսենա, Օբորդենա, Ակիլիսենա, Հաշտեանք եւ Մոփք վարչա-տարածքային միաւորների տարածքներում, այսինքն՝ նրա հիւսիսային եւ արեւմտեան շրջաններում: Ինչ վերաբերում է § 19-ում յիշատակուած քաղաքներին, ապա դրանք գտնուել են Անձիտի, Տոսպիտիսի եւ Կորիայայի տարածքներում³⁷: Այսպիսով, § 19-ում նկարագրուած է հիմնականում Մեծ Հայքի հարաւարեւմտեան ծայրամասերը՝ Վանայ լիճն իր յարակից շրջաններով: Այս երկուսի՝ հարաւ-արեւմուտքի եւ հիւսիսային եւ արեւմտեան տարածքների միջեւ միջանկեալ դիրք ունի Մոփքը, որը կարելի է ընդգրկել ե՛ւ մէկի, ե՛ւ միւսի մէջ: Այս վերլուծութիւնը ցոյց է տալիս, որ Ստամբնան չպէտք է որոնել § 19-ում յիշատակուած տարածքում, քանզի մեր կողմից արդէն բացայայտուել է, որ խալիբները հանգրուանել են Կարինի տարածքում կամ նրան շատ մօտ, որը գտնուել է Մեծ Հայքի հիւսիս-արեւմուտքում: Այս տարածքի մասին, ինչպէս տեսանք, Պտղոմէոսը յիշատակում էր §§ 14-17-ում, որտեղ եւս ընդգրկուած է բաւականին մեծ տարածք: Բասիլիսենան՝ դա Այրարատն է, որտեղ էլ գտնուել են Ուրարտուի, ապա նաեւ Երուանդունի, Արտաշիսեան եւ Արշակունի

34 Hecateus, fr. 196 (F. Jacoby, 202): Տե՛ս նաեւ Stephani Byzantii, *Ստամբնա*, խալիբ յօդուածները:
35 Տե՛ս Claudii Ptolomaei Geography, ed. C. Müller, Parisii, 1901, V, 13, §§ 1-22, տե՛ս նաեւ Дж. О. Томсон, *История древней географии*, Москва, 1953, էջ 404-405:

36 Տե՛ս Ptol, V, 13, §§ 14-17, 19:
37 Նոյն տեղում, V, 13, §§ 13, 18

արքաների նստավայրերը: Պատմիչն Այրարատից, որը Մեծ Հայքի կենտրոնում էր, անցում է կատարում հիւսիս-արեւմուտքին՝ Ակիլիսենէին եւ Կարինին, ապա սրանցից հարաւ-արեւելք ընկած Հաշտեանքին:

Հարցի այսպիսի արծարծումից անցում կատարենք Ստամբնայի տեղագրութեան խնդրին: Եթէ Համեմատական վերլուծութեան ենթարկենք Հեկատէոսի եւ Պտղոմէոսի վկայութիւնները, ապա Հնչիւնաբանօրէն Ստամբնային մօտ են Սագաւանա եւ Սոգոկարա անունները: Հաւանաբար, Ստամբնան ծագում է յունարէն stamen-ից, որն իր հերթին istemi բառի փոխուած տարբերակն է եւ ունի բազմաթիւ իմաստներ՝ տեղադրել, տեղակայել, ամրացնել, ամրապնդել...³⁸: Թարգմանութեան այսպիսի բազմազանութիւնը առիթ է տալիս Ստամբնա տեղանունան երկակի բացատրութեան: Կարելի է ենթադրել, որ այս քաղաքն ունեցել է հզօր պաշտպանական ամրութիւններ եւ անհասանելի է եղել արտաքին հակառակորդների համար: Երկրորդ՝ կարելի է ենթադրել, որ այս տեղանունը իմաստաբանօրէն պէտք է կապել այն գերազանցութեան հետ, որ ունեցել են նրա հիմնադիր խալիբները, ի տարբերութիւն իրենց հարեւանների: Նրանք էին, որ առաջիններից մէկը, եթէ ոչ առաջինը, ստացան ոչ միայն երկաթը, այլեւ սկսեցին ձուլել պողպատ: Այս մասին են վկայում Հերոդոտոսը, Քսենոփոնը եւ զրոյ էսքրիէսը: Չի կարելի նաեւ բացառել, որ խալիբ անունը կամ մականունը նրանք ստացել են պողպատաձուլութեամբ զբաղուելուց յետոյ: Սա նշում ենք այն պատճառով, քանզի խալիբ բառապաշարային կամ լեքսիկական միաւորն ունի յունական ծագում՝ բխելով պողպատ բառից: Հաւանաբար այս գերազանցութիւններն էլ, այն է՝

38 St' u И. X. Дворецкий, Древнегреческо-русский словарь, том I, Москва, 1958, էջ 838:

նախ երկաթի, ապա նաեւ պողպատի, եղել են փոխանունական անունակոչման հիմնական պատճառը՝ Ստամբնա քաղաքի խնդրում:

Հեկատէոսին՝ Պտղոմէոսից բաժանում է ամենաքիչը 560 տարի, եւ չի բացառում, որ այդ երկարատեւ պատմական ժամանակահատուածի ընթացքում, պատմական բազմաթիւ իրադարձութիւնների յորձանուտում Ստամբնան ձեւափոխուել է Սագովանայի կամ էլ Սոգոկարայի: Մեզ առաւել հաւանական է թւում առաջին տեղանունը, քանզի իրար նման են նաեւ վերջաւորութիւնները:

Այժմ մեզ անհրաժեշտ է քննարկել մոսսինոյկների զբաղեցրած տեղանքի խնդիրը: Նրանց կապակցութեամբ Հեկատէոսի յայտնած վկայութիւններն, ի տարբերութիւն նախորդների, խիստ խճճուած են: Այսպէս, 192-րդ հատուածում նա գրում է. «Մարեր, ժողովուրդ մոսսինոյկների հարեւանութեամբ, Ասիայի նկարագրութիւնում»³⁹: Առաջին հայեացքից ամէն ինչ թւում է պարզ եւ հասարակ, առաւել եւս, որ մարերի վերաբերեալ յիշատակում է նաեւ Հերոդոտոսը⁴⁰: Ինչ վերաբերում է մոսսինոյկներին, ապա Հերոդոտոսից զատ, նրանց վերաբերեալ յիշատակում են նաեւ Քսենոփոնը եւ Ստրաբոնը⁴¹: Ամէն ինչ կը լինէր միանգամայն պարզ եւ հասկանալի, եթէ չլինէր Հեկատէոսի հետեւեալ վկայութիւնը. «Խէյրադի, մոսսինոյկների քաղաքը Եւրոպայում (Ասիայում)»: Տիբարեններին արեւածագի ուղղութեամբ սահմանակցում են մոսսինոյկները, որոնց մօտ է

39 Hecateus, fr. 192 (F. Jacoby, 205)
 40 Հերոդոտոս, III, 24, VII, 79
 41 St' u Аноя տեղում, III, 94, VII, 78, Ават' Քսենոփոն, V, IV, 9-34, VII, VIII, 25, Strabo, XI, XIV, 5, XII, III, 18: Ստրաբոնը նրանց անուանում է Аватի հետապոստիտներ, որը, նրա իսկ բացատրութեամբ համաձայն, նշանակում է աշտարակ:

գտնուում Խէյրադի քաղաքը»⁴²: Խնդրի վերլուծումն ու պարզաբանումն սկսենք ամենավերջից՝ Խէյրադի քաղաքից: Այս քաղաքը եւս պէտք է փնտրել այնտեղ, որտեղ մենք փնտրեցինք Սագաւանան: Դժբախտաբար, մոսսինոյկների այս քաղաքի կապակցութեամբ, այդ հարցերի լաւագոյն գիտակ եւ մեր հիմնական սկզբնաղբիւր Հանդիսացող Պտղոմէոսը ոչինչ չի հաղորդում: Չկայ գէթ մէկ անուն, որը Հնչիւնաբանօրէն նման լինէր Խէյրադիին: Այս քաղաքի վերաբերեալ ոչինչ չի նշում նաեւ Պտղոմէոսին նախորդած Պլինիոս Աւագը, որը յիշատակում է հին Հայաստանի ամենանշանաւոր քաղաքները՝ Արտաշատը, Արմաւիրը, Տիգրանակերտը, Արշամատը, Կարկաթիոկերտը...: Այս անգամ եւս դիմելով պատմական լեզուաբանութեան օգնութեանը՝ կարելի է կատարել որոշակի ենթադրութիւններ: Այսպէս, Խէյրադի տեղանունը, մեր կարծիքով, հաւանաբար կապուած է հին յունական χείρ (χείρος) բառի հետ, որը նշանակում է ձեռք: Կարելի է ենթադրել նաեւ, որ այդ անունը ծագում է χερσιδός բառից, որը թարգմանում է դեկավարել, առաջնորդել⁴³: Այսպիսով, ընդհանրացնելով վերեւում ասուածը՝ կարելի է անել այն հետեւութիւնը, որ Խէյրադին կամ արհեստաւորների, հմուտ ձեռքեր ունեցող մարդկանց քաղաք էր կամ էլ մոսսինոյկների գլխաւոր քաղաքն էր, այսինքն՝ մայրաքաղաքը: Ինչ վերաբերում է Եւրոպա-Ասիա խառնաշփոթին, ապա այստեղ ամէն ինչ առաւել քան պարզ է: Ինչպէս տեսանք վերեւում, նոյն կերպ Ստրաբոնը խալիբ-խալիբներին բաժանում էր երկու մասի՝ բարելոնեան եւ փոքրասիական (Կապադոկիան): Չպէտք է զանց առնել, որ մոսսինոյկների մի մասը

42 Hecateus, fr. 193 (F. Jacoby, 204)
 43 St' u И. X. Дворецкий, Древнегреческо-русский словарь, том II, Москва, 1958, էջ 1769-1770:

տեղափոխուել է Եւրոպա, որից էլ հետեւում է այդտեղ նրանց յիշատակելու խնդիրը: Խնդիրն այն է, որ հեկատէոսեան դարաշրջանը չպէտք է դիտարկել նախորդ եւ հետագայ դարաշրջաններից անկապ կամ էլ քարացած եւ անփոփոխ վիճակում: Ուստի չպէտք է մոռանալ, որ հեկատէոսեանին նախորդել է կիմերա-սկիւթական ներխուժումների ժամանակաշրջանն Այսրկովկաս եւ հայկական լեռնաշխարհ, որը եւ պատճառ է դարձել ցեղային նոր տեղաշարժերի:

Իսկ ի՞նչ տարբերութիւն կայ այս երկու ներխուժումների միջեւ: Կիմերացիները բրոնզեայ մշակոյթի կրողներ էին, իսկ սկիւթները «...կեանքի բոլոր ասպարէզներում իւրացրել էին երկաթը եւ այն օգտագործում էին, որպէս հիմնական մետաղ, ե՛ւ աշխատանքի գործիքներ, ե՛ւ զէնք պատրաստելիս»⁴⁴:

Ինչպէս հաւաստիօրէն պարզաբանուած է այժմ, հայկական լեռնաշխարհում անցումը բրոնզից երկաթին սկսուել է Ք.ա. II-I հազարամեակների սահմանադիրին: Բայց սա երբեք չի նշանակում, որ այդ անցումը եղել է ակնթարթօրէն, մոգական գաւազանի մէկ հարուածի օգնութեամբ: Երկաթի լիակատար իւրացման համար դեռեւս անհրաժեշտ էր գոնէ 2-3 դար ժամանակ, որն էլ ժամանակագրական առումով համարեա համընկնում է կիմերա-սկիւթական ներխուժման հետ Այսրկովկաս, իսկ մասնաւորապէս՝ հայկական լեռնաշխարհի տարածքը: Կիմերները, զիջելով տեղաբնիկ հայկական ցեղերին, որոնք երկաթն արդէն իւրացրել էին, նահանջեցին արեւմուտք՝ դէպի Կապադոկիա, իսկ սկիւթների մի մասը, լինելով կենսունակ, մնաց այստեղ: Նրանք Հանգրուան գտան լեռնաշխարհի հիւսիսարեւմտեան ծայրամասում: Այն փաստի օգտին,

44 В. И. Гуляев, Скифы. Расцвет и падение великого царства, Москва, 2005, էջ 124

որ սկիւթները տարածուած են եղել համարեա ողջ օյկոմենի տարածքում, խօսում է թէկուզեւ այն հանգամանքը, որ սկիւթական դամբարաններ են յայտնաբերուել ներկայիս Գերմանիայի եւ Հունգարիայի տարածքներից սկսած, մինչեւ Ալթայ եւ Հիւսիսային Մոնղոլիա⁴⁵: Այս փաստը միաժամանակ ապացուցում է նաեւ, որ ոչ բոլոր սկիւթական ցեղերն են ունեցել երկաթ: Կենսունակ եւ մրցակցութեանը դիմակայող հանդիսացան երկաթ ունեցողները, իսկ միւսներն Այսրկովկասից պարզապէս հեռացան:

Այժմ վերադառնանք մոսսինոյկներին եւ խալիբ-խալդայներին: Ինչպէս ժամանակին վերջիններս մի մասը հեռացաւ իր տարածքից, որ հետագայում կատարեցին նաեւ ներթափանցած սկիւթները, այնպէս էլ նոյնն իրականացրին մոսսինոյկների մի հատուածը, որոնք երեւի իրագեկ չէին երկաթին:

Մոսսինոյկների հետ առնչուող բոլոր հիմնահարցերը կարելի է վերականգնել շնորհիւ Քսենոփոնի Անաքսիսի: Համաձայն պատմչի՝ երբ 10.000 յոյները նահանջել են, ապա նրանք հանգրուան են գտել մոսսինոյկների երկրում, որոնց արեւելքից սահմանակից էին մակրոնները, իսկ արեւմուտքում բնակուում էին խալիբները: Իր հետագայ շարադրանքում պատմիչը նաեւ ընդգծում է, որ հէնց մոսսինոյկների միջեւ փոխյարաբերութիւնները թշնամական էին. «Այնժամ Տիմեսիթէոսը յայտնեց հելլէներին, թէ այն կողմում բնակուող մոսսինոյկները թշնամի են այս մոսսինոյկներին»⁴⁶: Յոյները, յանուն իրենց յաջողութեան, որպէսզի կարողանան ապահով նահանջել, հաշտեցրել են մոսսինոյկ-

ների այդ երկու հատուածներին: Սակայն այդ հաշտեցումը եղել է կարճատեւ: Վերջինիս մասին է յուշում թէկուզեւ այն հանգամանքը, որ երբ Ք.ա. II դարի սկզբներին Արտաշէս Ա-ը սկսեց վերականգնել Մեծ Հայքի թագաւորութեան տարածքային ամբողջականութիւնը, ապա վերամիաւորուած Դերջանում ապրել են մոսսինոյկները: Դա իր հերթին նշանակում էր, որ մոսսինոյկների պարտուած մասը հեռացել է նախկինում զբաղեցրած տարածքներից եւ տեղափոխուել Մեծ Հայքի կազմում գտնուած Բարձր Հայք նահանգի տարածքը:

Իր հետագայ շարադրանքում Հեկատէոսը մերձսեւեծովեան տարածքներից տեղափոխուում է արեւելք՝ նկարագրելով սահմանը Հայաստանի եւ Կողքիսի միջեւ: Այս հարցի լուսաբանման կապակցութեամբ ուշագրաւ է Հեկատէոսի 190-րդ հատուածում յայտնած վկայութիւնը, որտեղ նա նշում է. «Խոյ, ժողովուրդ վեխիրների հարեւանութեամբ, Ասիայի նկարագրութիւնում: Մինչեւ այժմ էլ մնում է որպէս բեխիրների երկիր, որոնց կողքին եւ հարեւանութեամբ ապրում են խոյերը: Խոյերին արեւելքից հարեւան են դիզիրները»⁴⁷: Առաջին հայեացքից թւում է, թէ Հեկատէոսն ուղղակի սխալուում է, իրար հետ է շփոթում խոյ անուամբ ժողովուրդին եւ Խոյ վարչատարածքային միաւորը: Հեկատէոսից յետոյ առաջին անգամ Խոյի մասին կրկին խօսում է 19 դար անց իսպանացի ճանապարհորդ Ռուի Գոնսալես ղէ Կլաւիքոն (Ք.յ. XIV դ.). «Յաջորդ օրը՝ հինգշաբթի, յունիսի 5-ին, կէսօրին մօտ եկանք մի քաղաք, որ կոչուում էր Խոյ: Այն տեղակայուած էր հարթավայրում՝ շրջապատուած բազմաթիւ այգիներով եւ մշակուած դաշտերով: ...Այստեղից, այս քաղաքից սկսած, սկիզբ է առնում Վերին Հայաստանը, եւ սկսում է նաեւ Պարս-

45 Աւելի մանրամասն տե՛ս Թ. Թ. Բայս, *Скифы. Строители степных пирамид*, Москва, 2004, էջ 212-215 (приложение I, главные захоронения скифов и родственных им кочевых племён):

46 Քսենոփոն, V, IV, 3

47 Hecateus, fr. 190 (F. Jacoby, 200)

կաստանը: Այս քաղաքում ապրում են մեծաթիւ հայեր»⁴⁸: Դէ Կլաւիքոն խօսում է Հին Հայկական Հեր դաւառի մասին, որն իսպանացի այս ճանապարհորդի ժամանակ արդէն ստացել էր Խոյ անուանումը: Բայց, հազիւ թէ Հեկատէոսն այսպիսի մանրամասնութեամբ իմանար Հին Հայաստանի հարաւարեւելեան սահմանը, եւ քանի որ նրա կողմից յայտնած՝ Երուանդունիներին առնչուող վկայութիւնների առիւծի բաժինը վերաբերում է Հայաստանի հակառակ եզրին՝ Հիւսիս-արեւմուտքին, ապա այդ Խոյը եւս անհրաժեշտ է փնտրել այստեղ: Խոյերի մասին հեկատէոսեան նկարագրելը տարածքային առումով համընկնում է տաոխների երկրի հետ: Վերջիններիս մասին չորս անգամ վկայում է Քսենոփոնը՝ իր Անաքսիսիսում: Համաձայն վերջինիս՝ նրանք ապրել են Փասիանների հարեւանութեամբ եւ 10.000-ի նահանջի ընթացքում անցնելով տաոխների երկրով՝ յոյն վարձկաններն այնուհետեւ դուրս են եկել սկիւթ-խալդէյների տարածքը: «Այստեղից նրանք գնացին դէպի տաոխները հինգ կայեան՝ երեսուն եւ հինգ փարսախ, եւ նրանց պարէնը սպառուեց. քանզի տաոխներն ապրում էին ամրացուած վայրերում, որտեղ եւ փոխադրել էին իրենց ամբողջ պարէնամթերքը: Երբ (հելլէները) հասան մի վայր, որը քաղաք չէր, եւ որտեղ տներ էլ չկային, բայց ուր հաւաքուել էին այրեր եւ կանայք եւ շատ անասուններ, Խէյրիսիոսը, առանց սպասելու, իսկոյն յարձակուեց նրանց վրայ. եւ երբ առաջին ջոկատը յոգնեց, միւսը անցաւ յարձակման. յետոյ մէկ ուրիշը, քանզի անհնար էր ի մի հաւաքուելով այն պաշարել, շուրջանակի գահավէժ վայրում էր այն գտնուում»⁴⁹:

48 Рун Гонсалес де Клавихо, *Дневник путешественника в Самарканд ко двору Тимура (1403-1406)*, пер. со староиспанского И. С. Марковой, Москва, 1990, էջ 75-76

49 Քսենոփոն, IV, VII, 1-2

Տեղանքի այս նկարագրութիւնը, մեր կարծիքով, հիմնովին համապատասխանում է Հայկական Տայք նահանգի տեղադրութեանը, որի Հիւսիս-արեւմուտքում գտնուում են Պարիադրէսի (Պարխարեան) լեռները: Հին եւ միջնադարեան Հայոց պատմութիւնից քաջ յայտնի է, որ օտար նուաճողների դէմ պայքարում, մեր նախնիները քանիցս աշխատել են ռազմական գործողութիւնները տեղափոխել հէնց Տայք, որն ունէր անմատչելի լեռներ եւ խիտ անտառներ: Հետագայ շարադրանքում Քսենոփոնը խօսում է հէնց այդ մասին՝ նկարագրելով այն բոլոր տանջանքներն ու զրկանքները, որ իրենք տեսել են այդ տարածքում: Տաոխների երկրի եւ սկիւթ-խալդէյների երկրների միջեւ սահմանագիծ էր հանդիսանում Արպասոս կամ ներկայիս Ճորոխ գետը⁵⁰:

Իսկ ինչո՞ւ պէտք է տաոխների երկիրը տեղադրենք ուշ ստրկատիրական կամ վաղՖէոդալական դարաշրջանների Տայք նահանգում: Այս տարածքն ուրարտական արձանագրութիւններում (Մենուայի, Արգիշտի Ա-ի եւ յաջորդ թագաւորների), յայտնի է որպէս Դիաուխի երկիր, որն այժմ անհերքելիորէն ապացուցուած է⁵¹: Դիաուխի անունից է ծագում նաեւ Տայք նահանգի անունը, որը Քսենոփոնի մօտ ձեւափոխուել է Տաոխի-ի, իսկ նրա նախորդողների մօտ եղել է Խոյ: Հին վրացական աղբիւրներում այս սահմանային նահանգը առաւել յայտնի է Տաո-Կլարջետի

50 St'u anjā տեղում, IV, VII, 18. См.т. В. И. Гуляев, *Скифы. Расцвет и падение великого царства*, Москва, 2005, էջ 128-158:

51 Մանրամասն տե՛ս Գ. Ա. Меликишвили, *Гр. азгу.*, passim, *Առյճի՝ Диасхи*, ВДИ, 1950, N 4, էջ 26-42. Н. В. Арутюнян, *Топонимика Урарту*, Ер., 1985, էջ 73. *Առյճի՝ Корпус...*, passim, Б. Б. Пиотровский, *О происхождении армянского народа*, Ер., 1946, էջ 8 եւ յաջ. П. Н. Ушаков, *К походам урартийцев в Закавказье*, ВДИ, 1946, N 2, էջ 22. Յ. Մանանդյան, *Երկիր*, հտ. Ա, էջ 77 եւ յաջ.:

անուամբ⁵²: Եթէ յոյների մօտ առաւել ընդունուած էր Դօւս Գէս, ապա Ք.ա. I դարի պատմիչ Դիոդորոս Սիկիլիացու վկայութիւնները հակասում են դրան: Նա եւս բաւականին հանգամանորէն կանգ է առել 10.000 յոյների նահանջի նկարագրին եւ, փաստորէն, պարզապէս կրկնելով Քսենոփոնին, վերոյիշեալ տարածքն անուանում է Խալոնոյ գրեւով. «...այստեղ չորս օր անցկացնելուց յետոյ իրենց ճանապարհը շարունակեցին (խօսքը յոյների մասին է - Յ. Յ.) խալոնների եւ փասիանների երկրի միջով: Երբ տեղաբնիկները յարձակուեցին հելլէների վրայ, սրանց կռուում յաղթելով շատերին սպանեցին եւ, գրաւելով տեղաբնիկների տները, որոնք լեցուն էին բարիքներով, այնտեղ մնացին տասնհինգ օր»⁵³:

Տառիները երկրից մինչեւ Տրապիզոն քաղաքն ընկած ճանապարհի վրայ է գտնուում, համաձայն Քսենոփոնի, Գիւմնիաս քաղաքը, որտեղից էլ սկիզբ է առնում Արպաս գետը: Այս տեղանքն ամբողջովին համապատասխանում է Սպեր գաւառի գտնուելու տարածքին: Սպերի Հայաստանի անբաժանելի մաս լինելու վերաբերեալ երկրիցս յիշատակում է Ստրաբոնը⁵⁴: Գիւմնիասի մասին հպանցիկ խօսում է նաեւ Դիոդորոսը⁵⁵, սակայն այս բնակա-

վայրի մասին ոչինչ չգիտեն Հեկատէոսը եւ միւս անտիկ հեղինակները: Առաջին հայեացքից դա չի կարող տեղիք տալ կասկածանքների, բայց երբ Գիւմնիասի մասին լռում են նաեւ Պլինիոս Աւագը, իսկ առաւել եւս Պտղոմէոսը, ապա այս մէջը հարկադրում է իսկապէս մտորել: Մեր կարծիքով, նախ եւ առաջ, սա խօսում է այն մասին, որ իր շարադրանքի գոնէ այս հատուածում Դիոդորոսը կախուածութեան մէջ է Քսենոփոնից: Երկրորդ՝ այդ բնակավայրը ծագել եւ առաջացել է մի ինչ-որ անապատային, մեկուսացուած տարածքում եւ պատմական թատերաբեմի վրայ երկար չի մնացել: Երրորդ՝ եթէ կատարենք ծագումնաբանական վերլուծութիւն, ապա Գիւմնիաս անունը ծագում է յունարէն γυμνός այսինքն՝ թերեւազէն բառից, իսկ γυμνός անուանել են մերկ, բացարձակապէս շորագուրկ մարդուէն⁵⁶: Հին յունարէնում ամազոնոսի բառը հոմանիշ է թերեւազէնին: Այսպիսով, տալ վերջնական եւ համոզիչ պատասխան այն հարցին, թէ ովքեր են բնակուել Գիւմնիաս քաղաքում, առայժմ անհնարին է աղբիւրների սղութեան պատճառով⁵⁷: Չի կարելի բացառել նաեւ, որ Գիւմնիասը եղել է Այսրկովկաս, այդ թւում նաեւ՝ Հայաստան ներխուժած սկիւթական ցեղախմբերից մէկի ժամանակաւոր կացարանը: Անաքսիսի ուսերէն եւ հայերէն թարգմանութիւններն իրականացրած հեղինակները՝ Ս. Յ. Լուրիէն, Մ. Ի. Մաքսիմովան, Ս. Ի. Սորոլեւսկին եւ Ս. Մ. Կրկեաշարեանը իրաւացիօրէն քննադատում են Յ. Մանանդեանին, քանզի վերջինս Գիւմնիասը նոյնացնում է Գիւմրի (նախկին Լենինական) քաղաքի հետ:

56 Տե՛ս Ի. X. Дворецкий, *Ձ. աշխ.*, том I, էջ 330:
 57 Այս ամէնով հանդերձ պէտք է նշել, որ, եթէ Հեկատէոսը ոչինչ չգիտէ ամազոնոսիների վերաբերեալ, ապա նրա գործի շարունակող Ստեփանոս Բուզանդացին վերջիններիս մասին խօսում է բաւականին մանրամասն: Տե՛ս Բ. Բ. Латышев, *Известия...*, ВДИ, 1948, N 3, էջ 314:

52 Տե՛ս Լ. Մելիքեթ-Բեկ, *Վրացական աղբիւրները Հայաստանի եւ հայերի մասին*, հտ. I, Եր., 1934, էջ 12, 44, 68-69, 105, 137 եւ յաջ.:

53 *Օտար աղբիւրները Հայաստանի եւ հայերի մասին*, հտ. 14. Դիոդորոս Սիկիլիացի, XIV, 29, 1. տե՛ս նաեւ Diodori Bibliotheca Historica, ex recens. L. Dindoriti, v. I-V, Lipsiae, 1866-1668, XIV, 29,1:

54 Strabo, XI,IV,8, XI, XIV, 12: Ստրաբոնի ուսերէն թարգմանութիւնում Գ. Ա. Ստրատոնովսկին սխալում է, երբ ծանօթագրութիւնում նշում է, որ Սուսպիրիտիսը (Σουσιπίρις) քաղաք է, եւ անորոշ անվանում՝ Ասիայում: Տե՛ս Страбон, *География*, М., 1994, էջ 930:

55 Տե՛ս Դիոդորոս, XIV, 29,1, նաեւ՝ Diod., *Առջ տեղում*:

Սխալն ակնյայտ է, քանզի այդ քաղաքի տեղանքը չափազանց հեռու էր այն վայրերից, որտեղով անցնում էր նահանջող յոյների երթուղին⁵⁸: Թարգմանիչների հետ չի կարելի համաձայնել միայն մէկ խնդրի կապակցութեամբ: Նրանք, այն հարթավայրը, որտեղ գտնուել է Գիւմնիասը, տեղակայում են Բաբերդի գոգահովտում, որը հաւանական չէ, քանզի այդ անուանումը հանդիսանում է հին բառագիտական միաւորի վերանուանումն արդի ոճաբանութեամբ: Քսենոփոնի օրօք Բաբերդ քաղաքը, բնականաբար, գոյութիւն չուներ, իսկ վերոյիշեալ գոգահովտը յայտնի էր Խաղտեաց դաշտ անուամբ⁵⁹:

Հեկատէոսի յայտնած վկայութիւններից անլուծելի է մնում վիսիւրների տեղադրութեան խնդիրը: Ինչ վերաբերում է դիզիրներին, ապա նրանք, ինչպէս ասում է մատենագիրը, բնակուել են խոյերից արեւելք, բայց թէ կոնկրետ որտե՞ղ՝ եւս անհնարին է ստոյգ պատասխանել, քանզի չկան լրացուցիչ վկայութիւններ: Այսպիսով, ըստ VI-V դարերի սահմանազլխին ապրած եւ ստեղծագործած մատենագիր Հեկատէոսի եւ նրանից յետոյ հանդէս եկած այլ հեղինակների՝ Հերոդոտոս, Քսենոփոն եւ այլն, Հայաստանում իշխած Երուանդունիների թագաւորութեան հիւսիսարեւմտեան ծայրամասն ունեցել է այսպիսի սահմանագիծ. այն անցել է տառիների՝ հետագայ Տայքի տարածքով, ապա՝ կոլխերի, խալիւբների, խալդէյների, մակրոնների, մոսսինոյկների, ապա՝ կրկին խալիւբների, բայց այս անգամ՝ արեւմտեան, եւ վերջապէս՝ տիբարեանների երկրներով:

58 Տե՛ս Քսենոփոն, էջ 236, ճնթ. 32-33. նաեւ՝ Յ. Մանանդեան, *Հին Հայաստանի եւ Աղբիւրկական պատմութեան մի քանի պորթլեմների մասին*. Երկեր, հտ. Ե, Եր., 1970, էջ 263-266, 268-271:

59 Տե՛ս Լ. Т. Гюзальян, *Неизданные надписи Байбуртской цитадели*, - "Византийский вестник", том 8, М., 1956է

Սակայն այսքանով եւս չեն աւարտուում Հեկատէոսի վկայութիւնները Հայաստանի կապակցութեամբ: Նրա վկայութիւններում կան այլ բացեր, որոնք կարօտ են քննարկման եւ վերլուծութեան: Քաջ յայտնի է, որ Հայաստանի՝ աքեմենեանների կողմից նուաճուելուց յետոյ, տարածքի հիմնական մասը, ինչպէս նշում է Հերոդոտոսը, ընդգրկուել է 13-րդ սատրապութեան մէջ: Այս կապակցութեամբ պատմիչը վկայում է. «Պակտիւկէից, արմէններից եւ հարեւաններից՝ մինչեւ Եւքսինեանը, ստացուում էր չորս հարիւր տաղանդ. սա տասներեքերորդ նահանգն էր...»⁶⁰: Պակտիւկէ (Պակտուկ) երկրի տեղադրութեան խնդիրը որոշ ուսումնասիրողների համար վերածուել է իսկական կռուախնձորի: Գ. Կիպերտը այն տեղադրում է Վանայ լճից հարաւ, իսկ Յ. Մանանդեանը գտնում է, որ անհնարին է տալ ինչ-որ միանշանակ պատասխան: Ս. Տ. Երեմեանն էլ ենթադրում է, որ այն եղել է Կորդուք նահանգի տարածքում: Մենք չենք կիսում վերոյիշեալ կարծիքներից եւ ոչ մէկը: Չի կարելի համաձայնել նաեւ Հերոդոտոսի ուսերէնի թարգմանիչ Գ. Ա. Ստրատոնովսկու հետ, որը Պակտիւկէն հասցնում է Քաբուլ գետի հովտը՝ ներկայիս Աֆղանստանի տարածքում⁶¹: Վերոյիշեալ հեղինակների մոլորութեան պատճառներից է այն հանգամանքը, որ Հերոդոտոսն, ըստ էութեան, յիշատակում է երկու, իրար հետ ոչ մի օրգանական կապ չունեցող Պակտիւկէների մասին: Մեր կողմից օգտագործուած վերոյիշեալ մէջբերումում, ակնյայտ է, որ խօսուում է Հայաստանի հարեւանութեամբ գտնուող վարչատարածքային շրջանի մասին, որը միաժամանակ չափազանց մօտ է գտնուել Սեւ ծովին: Հերոդոտոսն իր մտքերը, որքան էլ թուայ տարրինակ, քողարկուած տարբերակով չա-

60 Հերոդոտոս, III, 93
 61 Տե՛ս Геродот, *История*, էջ 719:

րադրում է Արքայական ճանապարհի նկարագրութեան մէջ, որը կառուցել էր Դարեհ Ա-ը: Դրա մի փոքրիկ հատուածը քաջ յայտնի է, որ անցել է Հայաստանով եւ Հերոդոտոսն այս կապակցութեամբ նշում է. «Փոփոքիայից յետոյ (ճանապարհը) տանում է դէպի Հալիւս գետը, որտեղ (լեռնային) դարպասներն են, որոնցով անցնելուց յետոյ կտրոււմ-անցնում ես գետը: Անցարանում կայ ուժեղ ամրացուած անցակէտ: Այնուհետեւ Կապադովկիա մտնելով, ճանապարհը ձգւում է մինչեւ Կիլիկիայի սահմանը, քսանութ կայան՝ հարիւր չորս փարսախ: Այս սահմանում անհրաժեշտ է անցնել երկու դրուներ եւ կողանցել երկու պահակակէտ: Դրանք անցնելուց յետոյ Կիլիկիայի միջով ճանապարհը ձգւում է երեք կայան՝ տասնհինգ եւ կէս փարսախ»⁶²: Այսպիսով, Արքայական ճանապարհի այս հատուածը ձգուել է Հայաստանի արեւմտեան սահմանի հարեւանութեամբ, որն Աքեմենեան կայսրութեան կազմում ընդգրկուած է եղել 13-րդ ստորապոլսեան կազմում: Հայ պատմագիտութեան մէջ ճանապարհի այդ հատուածը, բոլորից աւելի մանրամասն քննարկուել է Յ. Մանանդեանի կողմից: Յաւոք, նշանաւոր հայագէտ-պատմաբանին չի յաջողուել գտնել այդ ճանապարհի ստոյգ երթուղին: Արդիւնքում նա գտել է, որ ճանապարհը Կապադովկիայից հասել է Մելիտենէ (Մալաթիա), ապա հատել է Եփրատը, ապա Տիգրիսը, եւ վերջինիս զուգահեռ, ձգուելով նրա ձախ ափով, հասել է Բեզաբդէ կամ Բզաբդէ քաղաքին: Ծանապարհի այսպիսի ուղղութիւնը պարզապէս իռացիոնալ էր, քանզի այն անտեղի երկարացում էր: Աւելին, այս դէպքում ճանապարհից դուրս է մտնում Կապադովկիան, որի մասին յիշա-

տակում է Հերոդոտոսը⁶³: Անտեսուում է նաեւ մէկ այլ կարեւոր փաստ: Ծանապարհը կառուցելիս Դարեհն աշխատել է հնարաւորինս ոչ միայն խուսափել բարձրալեռնային տեղանքներից, այլեւ այն անցկացրել է նպաստաւոր բնակլիմայական պայմաններ ունեցող տեղանքով: Յ. Մանանդեանն այդ ճանապարհը գծել է Հայաստանի հարաւային լեռնային այն շրջանների տարածքով, որտեղ տարուայ ընթացքում մի քանի ամիս կլիմայական պայմանները համեմատաբար աննպաստ էին: Այս պայմաններում պարզ է, որ ճանապարհը չէր կարող գործել ողջ ծանրաբեռնուածութեամբ, բոլոր ամիսների ընթացքում: Միայն մեր կողմից առաջադրուած պայմանների առկայութեան դէպքում է, որ ճանապարհը կարող էր լինել արդիւնաւոր, ի տարբերութիւն Յ. Մանանդեանի առաջադրած վարկածի: Ծանապարհի հայաստանեան, կապադովկեան եւ Կիլիկիայի հատուածներում պարսիկները, մեր կարծիքով, պէտք է աշխատէին հնարաւորինս այն մօտեցնել Եփրատին, որը նաւարկելի էր՝ Ձեւգմա քաղաքից սկսած: Այսպիսով, ճանապարհի կառուցման ժամանակ դրուելու էր երկու կարեւոր նախապայման. տեղանքի բարենպաստ կլիմայ ունենալու խնդիրը եւ, երկրորդ՝ լրացուցիչ ջրային, այս դէպքում գետային ճանապարհ լինելու առկայութիւնը, ինչպէս Եփրատն էր կոնկրէտ դէպքում: Վերոյիշեալ պայմանները պարտադիր էին Արքայական ճանապարհի հէնց հայաստանեան հատուածի համար, քանզի այն էսպէս տարբերում էր ճանապարհի միւս երկու ծայրերից: Ի տարբերութիւն ճանապարհի պարսկական եւ փոքրասիական հատուածների՝ Հայաստանն ունէր ոչ միայն համեմատաբար խիստ բնակլիմայա-

63 Я. А. Манандян, О торговле и городах Армении в связи с мировой торговлей древних времён; - *Երկեր*, Խտ. 2, Եր., 1985, էջ 14-15

62 Հերոդոտոս, V, 52

կան պայմաններ, այլեւ որոշ տեղերում՝ աննպաստ լեռնագրութիւն: Այս պատճառներով խնդրառու կը լինէր ճանապարհը կառուցել Բզաբդէ-Մելիտենա գծով, որն անցնելու էր անպայման Ամիդի եւ Տոմիսայի վրայով, այսինքն՝ Հայկական Տաւրոսի՝ թէկուզ եւ ոչ ամենաբարձր հատուածով: Յ. Մանանդեանի վարկածը որոշ չափով հակասում է Հերոդոտոսի վկայութիւններին, որը գրում է. «Կիլիկիայի եւ Արմէնիայի սահմանը նաւարկելի գետն է, անուր՝ Եփրատ: Արմէնիայում յիսուսվեց եւ կէս փարսախ տարածութեան վրայ կայ տասնհինգ կայան իջեւանատներով, այնտեղ կայ նաեւ պահակակէտ: Այս Արմէնիայից ճանապարհը մտնում է Մատինէ, որտեղ կայ երեսունչորս կայան, հարիւր երեսունութ փարսախի վրայ: Այս երկրի միջով հոսում են չորս նաւարկելի գետեր, որոնք անհրաժեշտ է նաւով անցնել (ընդգծումը մերն է - Յ. Յ.)»⁶⁴: Այս վկայութիւնը ոչնչով չի հակասում բանականութեանը. պարսիկները ցանկացել են ճանապարհը տանել այն վայրերով, որտեղ ցանկացած անհրաժեշտութեան դէպքում կ'ունենային նաեւ լրացուցիչ ճանապարհ:

Հերոդոտոսը, ինչպէս տեսանք վերջին վկայութիւնից, խօսում է Հայաստանով անցնող 56 փարսախի մասին (մէկ փարսախը հաւասար է 5549 մ, որի դէպքում 56-ը կը կազմի 320-330 կմ), որը նկատի չի ունեցել Յ. Մանանդեանը: Նրա առաջադրած երթուղու դէպքում ճանապարհը կազմում է 400 կմ մի փոքր աւելի, որը ձեռնտու չէր Դարեհին: Քաջ յայտնի է, որ Դարեհի գահակալութեանը զուգահեռ պահին երկրում տեղի ունեցած հզօր ապստամբութիւնները, որը դաս հանդիսացաւ առաջին հերթին հէնց նրա համար: Նրան անհրաժեշտ էր Պարսկաստանը հնարաւորինս կապել նուաճուած տարածքների հետ, նոր ապստամբութիւնների դէպքում զօրքն արագ

եւ անարգել տեղափոխելու համար: Բացի ռազմա-ստրատեգիականից՝ այն ունէր նաեւ քաղաքական եւ առեւտրա-տնտեսական նշանակութիւն: Այս պատճառներով էլ ճանապարհը պէտք էր կառուցել այն տարածքների վրայով, որի նպաստաւոր պայմանները եւս թոյլ կը տային նրա մշտապէս եւ անխափան գործունէութիւնը:

Մեր կարծիքով, ինչպէս իրաւացիօրէն ցոյց է տուել նաեւ Բ. Յարութիւնեանը⁶⁵, Կապադովկիայից Կիլիկիա իջնելուց յետոյ ճանապարհը ձգւում էր հիւսիս-արեւելքից դէպի հարաւ-արեւելք, մի լեռնանցքով, որին արեւմուտքից յարում է Կիլիկեան Տաւրոսը, իսկ արեւելքից՝ Հայկականը: Այստեղից սկսած՝ ճանապարհն անցնում էր Հայկական Տաւրոսի հարաւային լանջերին զուգահեռ, ձգուելով համարեա ուղիղ գծով՝ արեւմուտքից արեւելք: Հէնց այս հատուածում էլ՝ Եդեսիայից մինչեւ Մծբին, մօտ 320-330 կմ, ճանապարհը գնում էր դէպի արեւելք, ուր հատում էր Տիգրիսը: Այս հատուածից յետոյ միայն այն իջնում էր հարաւ՝ հասնելով Եգրազծին՝ Շօշ:

Այստեղ անհրաժեշտ է կանգ առնել մէկ կարեւոր հարցի վրայ եւս. Հայաստանի հարաւային սահմանագիծը, նաեւ այն իրողութիւնից յետոյ, երբ այն բաժանուեց Մծեւ Բ. Փոքր Հայքերի (դա տեղի է ունեցել 331-330 թթ. Գաւգամելայից անմիջապէս յետոյ)⁶⁶: Հայկական Տաւրոսի հիւսիսային եւ հարաւային լանջերի տարածքը վաղնջական ժամանակներից բնակեցուած են եղել Հայերով եւ առաւել յայտնի է Հայոց Միջագետք անուամբ: Աւելի ուշ այստեղ, ըստ մի տեսակէտի, հիմնադրուեց Օսրոյենէի եւ Եդեսիայի Հայկական թագաւորութիւնը (Ք.ա. 132 - Ք.յ. 216 թթ.), ուր իշխել են Աբգար անունով թագաւորները (այդ

65 Յ. Խորիկեան, *Աշխ.*, էջ 173-192
66 St'u Квинт Курций Руф, *История Александра Македонского*, сохранившиеся книги, под ред. В. С. Соколова, М., 1963, IV, XII, 10, 12:

64 Հերոդոտոս, V, 52

Արգարներից մէկին Տակիտոսն անուանում է նաեւ արարների թագաւոր)67: Հէնց այս տարածքն էլ, մեր կարծիքով, նկատի ունէր Հերոդոտոսը, երբ վկայում էր Արքայական ճանապարհի հայկական հատուածի մասին: Հիւսիսային կամ Հայոց Միջագետքի հայկականութեան վերաբերեալ յիշատակում է նաեւ Խորենացին68: Պատմիչը նաեւ պարզաբանում եւ բացայայտում է, թէ ինչպէ՞ս, ի՞նչ հանգամանքների բերումով, հայկական այդ տարածքները հետագայում անցան Հռոմի տիրապետութեան ներքոյ. «Բայց թիկունս առնելով Երուանդայ. (խօսքը Երուանդ Դ Վերջինի մասին է - Յ. Յ.) զՀռոմայեցիս՝ ոչ ինչ վտանգի ի թագաւորութեանն Վէսպիանու եւ Տիտոսի, թողով ի նոսա զՄիջագետս»69: Այս վկայութիւնը եւս, կրկին անգամ ապացուցում է, որ այդ տարածքները Երուանդունիների գահակալութեան ողջ ընթացքում եղել են հայկական, եւ միայն վերջին Երուանդունու օրօք է, որ այն կորսուել է: Խորենացու գործընկեր Փաւստոս Բուզանդը այս տարածքների վերաբերեալ թողել է մի ուշագրաւ վկայութիւն: Նա նշում է, որ Պապ թագաւորը Հայ-Հռոմէական յարաբերութիւնների սրման շրջանում, իր դեսպաններին է ուղարկում Վաղէս կայսեր մօտ՝ հետեւեալ պահանջով. «...եթէ Կեսարիաւ հետ՝ եւ տասն քաղաք մեր լեալ է, արդ՝ ի բաց տո՛ւր, եւ զՈւռհա քաղաք շինեալ է նախնեացն մերոց, արդ՝ եթէ ոչ կամիս խանգար ինչ առնել, տո՛ւր ի բաց, ապա թէ ոչ, կռուիմք մեծաւ պատերազմաւ...»70:

67 Тацит, *Анналы*, том I, XII,12; տե՛ս նաեւ Հ. Գ. Մելքոնեան, *Ադիարեցի պետութիւնը եւ Հայաստանը*, Եր., 1980, էջ 113:
 68 Տե՛ս Խորենացի, Բ, 14, 14:
 69 Նոյն տեղում, Բ, 12
 70 Փաւստոսի Բուզանդացու Պատմութիւն Հայոց, Թիֆլիս, 1912, Ե, 1ր: Համարեա նոյն միտքն արտայայտուած է Սեբեոսի մօտ՝ կապուած այլ իրողութեան հետ. տե՛ս Պատմութիւն Սեբեոսի, աշխ. Գ. Վ. Արգարեանի, Եր., 1979, ԺԱ., 15-35:

Մեզ անհրաժեշտ է պարզել նաեւ Պակտիւիկէի պատկանելիութեան հարցը: Ամենայն հաւանականութեամբ, այս երկրամասը գտնուել է Երուանդունիների թագաւորութեան կազմում: Այս տարածքի վրայով էլ Երուանդունիները ելք են ունեցել դէպի Սեւ ծով: Պակտիւիկէ երկրով ամենակարճ ճանապարհը դէպի Սեւ ծով անցնում է Թերմոզոն(տ) գետի հովտով, որը յոյները կոչել են նաեւ Λύκος (դա ներկայիս Թուրքիայում գտնուող Իշիլ-Իրմակ գետն է): Հայաստանի կապակցութեամբ Հեկատէոսի մեծաթիւ եւ բազմաբնոյթ հաղորդումները ցոյց են տալիս, որ նա (այդպէս եւ նրան շարունակողները) Հայաստանը համարում էին մէկ ամբողջական օրգանիզմ: Միայն Գաւգամելային մասնակցած Երուանդունուց յետոյ էր, որ պետութիւնը երկատուեց, որի մասին խօսեցինք վերեւում: Երկրի միասնականութեան խնդիրը պարզորոշ երեւաց խոյերի, մարերի, խալիբների, մոսսինոյկների... հարցերը քննարկելուց յետոյ:

Պէտք է եզրակացնել նաեւ, որ Հեկատէոսը քաջատեղեակ էր Աքեմենեան Իրանի վարչա-տարածքային բաժանումների մասին, որ իրականացրել էր Դարեհը, եւ փաստօրէն գիտէր, թէ ինչպիսի վարչական կացութիւն ունէր Հայաստանը: Մենք ելնում ենք ոչ միայն այն հանգամանքից, որ Հեկատէոսն ու Դարեհը ժամանակակիցնէր էին, այլեւ այլ կոնկրէտ փաստարկներից: Ասուածի լաւագոյն կռուան է Հերոդոտոսի հետեւեալ արտայայտութիւնը. «Բոլոր ներկաները համակարծիք են լինում եւ խորհուրդ տալիս ապստամբելու. միայն լոգոգրաֆ Հեկատէոսը, թուարկելով Դարեհին ենթակայ բոլոր երկրները եւ նրա ունեցած ռազմական ուժերը, սկզբում խորհուրդ է տալիս չպատերազմել պարսից արքայի դէմ»71: Այս վկայութիւնը պարզորոշ յուշում է, որ Իրանի վարչական բաժանումների, սատրապութիւններից իւրաքանչիւրի

71 Հերոդոտոս, V, 36

կողմից պետութեանը տրուող հարկերի եւ բանակին նորակոչիկներ տրամադրելու մասին տուեալները Հերոդոտոսը վերցրել է Հեկատէոսից: Փաստօրէն պարզուած է նաեւ, որ Հեկատէոսի աշխատութեան մեզ չհասած հատուածներից մէկն էլ վերաբերել է այս հիմնահարցերին72: Այս վկայութիւնը նաեւ ապացուցում է, որ Հերոդոտոսը միշտ չէ, որ արդար է իր վկայութիւններում, չէ, որ արդար է իր վկայութիւններում, քանզի նա իր մասին նշում էր. «...ես պարտաւոր եմ հաղորդելու այն ամէնը, ինչ պատմում են, բայց այդ ամէնին հաւատաւոր եմ հարկէ, ես պարտաւոր չեմ»73: Փաստօրէն, տեղեկանալով այդ ամէնի մասին, Հերոդոտոսը իրեն է վերագրում Իրանի ներքին կացութեանն առնչուող բազմաթիւ տուեալները74:

Հեկատէոսից յետոյ Սեւ ծովի հարակրեւելեան արէալում՝ Հայաստանի, Վիրքի եւ Պոնտոսի միջեւ ընկած տարածքներում յայտնուեցին նաեւ այլ ցեղեր եւ ժողովուրդներ: Բայց նրանք չունեցան

72 Քանի որ շարադրանքի ընթացքում յատկապէս մեծ տեղ յատկացրինք Հեկատէոսի պատմա-աշխարհագրական ժառանգութեանը, ապա պէտք է յիշենք, որ նա եւս իր ժամանակի ծնունդն էր: Ինչպէս նշում է Է. Ֆրոլովը. «... Իրականում լոգոգրաֆներն աչքի էին ընկնում եւ տարբերակում մի շարք այլ գծերով: Նրանք պատմիչներ էին, բայց դեռեւս, որպէս այդպիսի, մնում էին չկայացած» (Յ. Դ. Փրոլով, *Факел Прометей. Очерки античной общественной мысли*, Л., 1981, էջ 96):

73 Հերոդոտոս, VII, 152
 74 Դրան եւ վերաբերում Հերոդոտոսի Պատմութեան III գրքի 89-94 գլուխները: Եթէ Հերոդոտոսի հաւատոյ հանգանակն է Հեկատէոսին լուրջապէս շրջանցելը, ապա Ստրաբոնի մօտ կան նեղագիտական տուեալներ: Վերջինս Հեկատէոսին ներկայացնում է որպէս փիլիսոփայ, բանաստեղծ, Հոմերոսի գործի շարունակող... Տե՛ս Strabo, I, I, 1, 11; I, II, 6: Բայց իր հետագայ շարադրանքում, երբ անհնարին է դառնում որոշ հարցերի մեկնաբանումը, նա հարկադրուած նշում է Հեկատէոսի անունը՝ որպէս պատմիչ-աշխարհագրագետի. տե՛ս Strabo, VI, II, 4; VII, III, 6; VII, V, 8; VII, VII, 1:

այն կենսունակութիւնը, որը ցուցաբերեցին վերեւում յիշատակուածները, ուստի եւ 10.000 յոյների արշաւանքից յետոյ այդ ցեղերը՝ փասիանները, ալարոնները, սասպէյրները, թերեւս կորցրին իրենց դէմքը: Այս պատճառով էլ նրանց մասին Ստրաբոնը ոչինչ չգիտի: Նրանք, ի վերջոյ հիմնականում միաձուլուեցին հայերին եւ վրացիներին. «...Ճորոխ գետի աւազանը Ք.ա. VII-VI դդ. բնակեցուած էր սկիւթական ցեղերով, որոնք հպատակուեցին տեղի հայերին, իսկ Ճորոխի գետաբերանում՝ բնակուողներն՝ իրենց ենթարկեցին վրացական ցեղերին: Բայց Ք.ա. I հազարամեակի երկրորդ կէսին, Հայ ժողովրդի կազմաւորման յորձանուտում նրանք հիմնականում ենթարկուեցին Հայացման»75:

Այսպիսով, յեննելով Հեկատէոսի եւ նրա գործը շարունակող Հերոդոտոսի եւ Քսենոփոնի վրայ՝ մենք կարող ենք ուրուագծել Երուանդունիների թագաւորութեան գոնէ որոշ հատուածների սահմանները, իսկ առաջին հերթին՝ հիւսիս-արեւմուտքի եւ հարաւի: Իսկ դրանք, ինչպէս տեսանք, վերոյիշեալ մատենագիրների վկայութիւնների համադրումից, համարեա համընկնում էին հետագայում ձեւաւորուած Մեծ եւ Փոքր Հայքերի սահմաններին՝ միասին վերցրած:

75 Б. А. Арутюнян, *К вопросу об этнической принадлежности населения бассейна реки Чорох в VII-IV вв. до н. э.*, - *ЛՀԳ*, 1995, թիւ 1-2, էջ 246